

Kalaallit Nunaanni akileraarpallaarutinit erniat maannakkut atuuttut 4%-iniit 2%-inut appartinneqarnissaannut Naalakkersuisut peqquneqarnissaannik aalajangiiffigissatut siunnersuut.

(Inatsisartuni ilaasortaq Naaja H. Nathanielsen, Inuit Ataqtigiit)

Akissuteqaat

(Aningaasaqarnermut Naalakkersuisoq)

Siullermeerneqarnera

Akileraarpallaarutinit iluanaarniartoqartannginnissaa pillugu Inatsisartuni ilaasortaq Naaja H. Nathanielsenip siunnersuutigaa akileraarpallaarutit erniaasa 4%-iniit 2%-inut appartinneqarnissaat.

Inatsisartuni ilaasortaq ilumoorpoq, 4%-inik erniaqartitsinerup, ullumikkut erniat appasissorujussuunerat eqqarsaatigalugu erniat taakku qaffasissutut isigineqarsinnaammata, imaanngilarli erniat taama appasitsigiuannassasut. Ukiup ataatsip ingerlanerani erniaritinneqartoq 5%-iniit 2,5%-inut appariarsimavoq, aningaasarsiornikkulli immikkut ilisimasallit ilimaginnigilaat taamatut ingerlaannartoqarsinnaanera, naatsorsuutigalugulu erniat nalingisa qaffaqqinnissaat.

Erniaritinneqartup aqagu aappaaguluunniit allanngorsinnaanera ilisimareernej ajornartarpoq, taamaammat 4%-inik erniaqartitsinerup iluanaarutiginiarneqarsinnaanera iluanaarutiginiarneqarsinnaannginneraluunniit ilisimaneqanngilaq. 2007-imi atuisartunut akit 5,4%-inik, 2008-milu 4,5%-inik qaffariaateqarsimaneri eqqarsaatigalugit akileraarpaallaarutinit 4%-inik erniaqartitsineq annertugisassaannigilaq.

Akileraarpallaarutinilli iluanaarniarsinnaaneq Naalakkersuisut miserratiginngikkaluaaraat, taamaattoq ilimagineqanngilaq annertunissaa; Akileraaruserinermik ingerlatsineq pillugu Inatsisartut inatsisaanni § 25-mi takuneqarsinnaavoq akileraarpallaarutit nammineq piumassuseq naapertorlugu akilerneqartartut ajunngitsorsiassartaqanngimmata; inatsimmilu tassanerpiaq § 15-i naapertorlugu akileraarpallaarutit utertinniarneqarpata taakkuttaaq ajunngitsorsiassartaqanngimmata. Akileraartarnermi ingerlatsinerup aqqissuussaanerata, nammineq piumassuseq naapertorlugu akilerneqartut ernialersornerisa naatsorsornissaannut naleqqussagaannigilaq.

Taamaattumik Naalakkersuisut isumaqarput ernianik iluanaarniarsinnaaneq inatsisitigut killilerneqareersoq, taamaattumillu akileraarpallaarutinit erniarititap annertussusaa allanngortikkumanagu aalajangiusimavaat, ullumikkullu erniat appasinnerat innersuussutigalugu erniaritinneqartoq allanngortinneqassagaluarpat malitsigiinnassavaa erniat nalingisa allanngortinneqarneri tamaasa ajunngitsorsiassat aamma allanngortittarnissaat.

Erniat allanngortartut, soorlu diskonto 1 %-imik taperlugu toqqammavigissallugu aamma periarfissaanngilaq, ilisimaqqissaareertariaqarmammi qanoq ilinikkut akileraarpallaarutit pinngorsimanersut. Tassami ajunngitsorsiassat ukiup aallartinnerani naalerneraniluunniit naatsorsorneqarpata assigiinnigissuteqarluarsinnaammata.

Naggataagut malugeqquneqarpoq akileraarpallaaruteqarsimasut
ajunngitsorsiassaqartinneqartarnerat pissusissamisuuginnarmat pisortanullu akiitsullit
utertoortinik ilanngaanneqarsinnaallutik. Taamaalilluni ukiumi 2009-mi aggustip naanerani
akileraarpallaarutinik agguaassinermi pisortanut akiitsut taakkunannga 28 mio. kr.-it
akilersinneqarput.

Taamatut oqaaseqarluta siunnersuut aappassaaneerneqannginnerani Akileraartarnermut
Akitsuusiisarnermullu Ataatsimiititaliamut Naalakkersuisut innersuussutigaa.